

# 1 Bheigtuvluv

## *Gevq-a nail gaq*

Haoqgavq niil keiv iqmoeq ilmoeq bhai Gaqkhoel Bheigtuvluv aivq-i mail gevq-a nail ngaol dai, gevq-ai thaq nail ngaol. Al ovq-tavq, milnee uqnee khe Khali yaq juq iqsanl Bheigtuvluv-i mail gevq-a nail ngaol dai, noeq nail ngaol. Bheigtuvluv nail aqmil neq, iqmoeq-u phao Silmoq dai, mil nail ngaol. Daoqceevq neq, naldaiq nail gaq dai, ge movq nail ngaol. Thailhai ngaol-aog, haoqnao Heeqphaq Yeiqsul-i mail Geiqphal dai, mil phal bhiq-a nail ngaol. Daoqceevq neq, lovmav dai, ge movq nail ngaol. Bheigtuvluv dai mil nail neq, Heiqlaqsal daoq pevq khi, daoqceevq neq, Geiqphal khe-ai lovmav dai, ge movq nail ngaol. Aivq nail jaqbheq Aqdaiqlaiq dai mil khi, aivq nail aqbhu neq, Yaolnav dai mil nail ngaol. Heeqphaq Yeiqsul nail gaqkhoel maq jiovq lal-u phao, Yaolhaq khi mail Yaqkov khe-ai, delgil nieivq jaq-a nail tsaol-aq ngaol.

## *Gevq-a nail aqyanq khi mail aqduq*

Gevq-a nail aqyanq neq, A.D. 64 kovq niidai bhai gevq-a nail ngaol. Gevq-a nail aqduq neq, Lolmav meenq bhai ngaol dai, noeq nail ngaol. 1 Bheigtuvluv nail haoqgavq bhai ge daiq-u phao, Bheigtuvluv neq, Paolluv-i mail gevq-a nail 1 Tilmolseiq, Lolmav, Eilpheilsu, Pillilpiv khi

mail Yaqkov haoqgavq bhai heeq nia nail khe-ai, gevq-ai thaq nail ngaol. Bheigtuvluv neq, heeqphaq Neiqlol uvthaiq nail tsel hail kovq teevq kovq A.D. 67-68 kovq nii dai bhai uqhuq thaog pov phaog-ail bhi tavq heivq-a nail ngaol, noeq nail ngaol.

*Khaq sil gaq bhai gevq bhiq-a nail*

Haoqgavq niil keiv neq, khoeq nail jiovq nail bhai ya daq-a nail ngel-i mail, teevq gaq teevq phao tsaog pav tsaog sal-aivq khi jaol nail Miqyail-i mail tsel dov-ai thaq nail tsaol-aq bhai gevq bhiq-a nail ngaol.

*Khul bhai noeqthunq khi gevq-a nail*

Haoqgavq niil keiv neq, Khali yaq juq khoeq nail jiovq nail phaog bhai thaogphuq-u phao, neema ivq khi, Heeqphaq Yeiqsul bhai noeqthunq khi aqmeeq-ai daq nia dai, gaq bivq-a nail ngaol.

Al ovqtavq, hevqkovq nail phaog bhai neema thaqtsaol nail phaog maq bhi laiog-ail dai, Miqyail neema tsaog nail khe-ai, khalhai ya doevq ya nl nail dai iqsanl, cavq bhiq cov bhiq nail haqbhoil gevq-a nail haoqgavq ngaol.

*Iqmoeq ilmoeq khe daog*

<sup>1</sup> Ngal neq, Yeiqsul Khali nail Gaqkhoel Bheigtuvluv ngaol. Gaoq ail gail ail khi, Bhaoqthul milkhaoq, Gaqlaqtil milkhaoq, Gaqbhaqdaolciv milkhaoq, Aqsil-aq milkhaoq khi Bheiqthulnil milkhaoq bhai daq-i jiovq khi jaol ail-a nail Miqyail-i mail tsel dov-ai thaq nail tsaol-aq bhai haoqgavq niil gevq bhoel-ai leevq-a nail

ngaol. <sup>2</sup> Yeiqsul Khali nail daoq bhai naldaiq dai maqkhaiq, aivq nail aqsivq nuljuq nail kovtavq bhai hoeldav dai maqkhaiq, iqmoeq-u nee mail Aqbhu Miqyail heeq nia khi noeqceiv-ai thaq nail khe-ai, nuljuq bhai tsel dov-ai thaq nail ngaol. Al ovqtavq, aivq nail Aqhaqlal-i mail nuljuq bhai bhi meeq bhi haol lal-a nail ngaol. Geeqlaoq eeljaol khi neesal-ovq nail phaqq nuljuq nail lavqkhoel bhai bhi mao lal dei-eiq.

*Noeqthunq duq jiav lal-a nail ganl*

<sup>3</sup> Ngadao nail Heeqphaq Yeiqsul Khali nail Aqbhu Miqyail bhai tsiqeeq bhel. Khul khi mail dai ngal neq, aivq gaoqhaq gaiq-a nia deedee nail bhaqda nee, Yeiqsul Khali sil khi doevq kovq lal nail ngel-i mail, ngadao bhai doevq yeel aqsivq bivq lavq-a nail ngaol. Alheel ngel-i mail, ngadao aqdoevq doevq nail noeqthunq nail phaqq ya-a nail ngaol. <sup>4</sup> Al ovqtavq, ngadao Miqyail nail jaiqbhoil ovq nail tsaol-aq pevq lal-a nail ngaol. Maq cov-ail nia nail, maq jiiv maq cavq-ail nia nail, maq khuq-ail nia nail jaiqbhoil al bhai Miqyail nuljuq nail haqbhoil nqtavq kovtavq bhai lainq-ai thaq nail ngaol. <sup>5</sup> Nuljuq neema thaqtsaol nail ngel-i mail, haoqnao naosaq ngaol phaodaiq lavq nail hevqkovq nail phaqq bhai ya nail aqyangq bhai kev dai, Miqyail aivq nail bhaqaoq lavqkhoel nee heldaiq phail lavq nail ngaol. <sup>6</sup> Alheel ngel-i mail, nuljuq niil aq-il teevq yangq nail lavqkhoel haq nail aoq nail khi laonqdaiq nail phaqq bhai ya daq khi ngaol-aoq, lavqkhiq tsail yaoq. <sup>7</sup> Heel bhai miqjaq nee tsaotseil daiq nail khe-ai, haq nail aoq nail



ngaol dai, Miqyail aqyu juq bhai phaodaiq bhiq-a nail ngaol. Aqyu juq-i mail gedan-a nail ganl al, niil aq-il, nqtavq nee mail bhi lee-a nail Meeqnail Haolnail Aqhaqlal lavqkhoel nee, gaqkhoel juq nuljuq bhai cavq lavq-a nail ngaol. Cavq lavq-a nail al neq, lavqkhiq tsail nail geeqlaoq daoq ngaol. Nqtavq gaqkhoel iqsanl, al juq bhai moel movq deedee nail ngaol.

*Aqmeeq aqhaol haol dai, doevq yaoq*

<sup>13</sup> Alheel ngel-i mail, neema lavqkhoel bhai aqmeeq-ai lainq khi, neema bhai gaq lai dai doevq yaoq. Yeiqsul Khali dov lee-u phao, aivq-i mail nuljuq bhai bivq lavq nail geeqlaoq eeljaol bhai aqmeeq-ai noeqthunq yaoq. <sup>14</sup> Aq-u phao, nuljuq khul teevq pha qiqsanl maq heeq nia nail ngel-i mail, yovqgavq nail aqsivq haqjoil nail neekhaol nee doevq-a nail ngaol. Niil aq-il alhai tha q gaoq doevq. Daoq naldaiq nail yaq khe-ai doevq yaoq. <sup>15</sup> Nuljuq bhai khul-a nail Miqyail meeq nail haol nail khe-ai, nuljuq iqsanl aqmeeq aqhaol haol dai doevq yaoq. <sup>16</sup> Khul khi mail dai ngal neq,

“Ngal aqmeeq aqhaol ngel-i mail, nuljuq iqsanl ya meeq ya haol nail ngaol” dai,

Jalliq lavqkhoel bhai gevq-ai tha q nail ngaol.

<sup>17</sup> Nuljuq geeqlaoq hal-u phao, Miqyail bhai “Aqbhu-ol” dai, khul nail ngaol. Aivq neq, maivphaoq eeq nil maq tsel-ail, teevq gaq khai-aq teevq gaq-i mail nl-a hal-a nail bhai heldaiq khi dal bhiq nail ngaol. Alheel ngel-i mail, nuljuq miltsaq kovtavq bhai daq-i jioqv-u phao, aivq bhai ev ev-ail doevq yaoq. <sup>18</sup> Aqphiq aqbhal juq-i

mail thaoq khal leevq-a nail aol juq bhai ya jel-ail dai, aivq nuljuq bhai ul kovq lavq-a nail ngaol. Peivq-ail boev-ail nia nail phul heel bhai juq khi ul kovq lavq-a nail maq ngel-ail dai, nuljuq heeq nia nail ngaol. <sup>19</sup> Aqphoiq phoiq deedee nail Khali nail aqsivq-i mail ul kovq lavq-a nail ngaol. Khali neq, malbavq maq daol nail nee ovqtavq, aqjiivq aqcavq phaqaq teevq peivq-ail maq aol nail yaolyaq khe-ai dul nail ngaol. <sup>20</sup> Aivq alhai pevq lal dai, miltsaq maq teivq-u nee mail Miqyail aivq bhai tsel dov-ai thaqaq nail ngaol. Haoqnao naosaq khe aqyanq niil nail lavqkhoel-ai, Miqyail aivq bhai nuljuq nail haqbhoil bhi dov lee-a nail ngaol. <sup>21</sup> Khali bhaqda nee nuljuq Miqyail bhai neema thaqtsaol nail ngaol. Miqyail aivq bhai bhi doevq kovq lal khi, seiqleiq khaoqsail bivq-a nail ngaol. Alheel ngel-i mail, nuljuq Miqyail bhai neema thaqtsaol khi noeqthunq nail ngaol.

<sup>22</sup> Nuljuq maldil tsaqaq nail phaqaq bhai naldaiq-a nail ngaol. Alheel ngel-i mail, aqivq jaqbheq Khali yaqaq juq bhai maldil gaiq-a kivq dai, nuljuq nail neema meeq lal haol lal-a nail ngaol. Nuljuq neema lavqkhoel bhai kev dai, teevq gaqaq nee teevq gaqaq gaiq-a yaoqaq. <sup>23</sup> Nuljuq neq, aqsivq doevq phal lal-aogaq nail ngaol. Luq-ail seil-ail nia nail tsaol-aq bhaqda nee doevq phal lal-a nail maq ngel-ail. Maqaq luqaq maqaq seil-ail nia nail Miqyail nail daoqaq bhaqda nee doevq phal lal-a nail ngaol. Daoqaq al daoqaq neq, doevq khi ivq nail ngaol. <sup>24</sup> Khul khi mail dai ngal-aq neq,  
 "Tsaol-aq iqsanl mail  
 moeqgaqaq khe-ai  
 dul nail ngaol.

Aqyu juq nail  
 khaoqsail iqsanl  
 moeqgaq aqev khe-ai  
 dul nail ngaol.  
 Moeqgaq neq,  
 khuq-ail kov-ail khi,  
 aqev iqsanl  
 ga kha ail nail ngaol.  
<sup>25</sup> Thailhai ngaol-aoq,  
 Miqyail nail  
 daoq neq,  
 nqmaq maqluv  
 halyeel ivq nail ngaol” dai,  
 ge-ai thaq nail ngaol.

Daoq al daoq neq, nuljuq bhai cavq bhiq-a nail  
 lavqkhiq tsail nail geeqlaoq daoq al daoq ngaol.

## 2

<sup>1</sup> Alheel ngel-i mail, yu bhai khoeq lai dai nl  
 movq nail, goiqbhaoq bhaoq nail, maq ngel nail  
 bhai ngel nail khe-ai jiovq nail, yu bhai maivjeel  
 jeel nail khi, haoqnao phao nee khal ge movq-ail  
 ge nail, niil juq iqsanl bhai khaonq ha-ail ceevq  
 yaoq. <sup>2</sup> Yaqbeiv aqtsil cuvq movq nail neema  
 aol nail khe-ai, nuljuq iqsanl aqhaqlal phao khe  
 maljiaov deel aqtsil cuvq movq nail neema aol  
 yaoq. Nuljuq aqtsil al cuvq haq neq, hevqkovq  
 nail lavqkhoel eeq lal nail ngaol. <sup>3</sup> Khul khi mail  
 dai ngal-aq, nuljuq neq, Heeqphaq Miqyail nail  
 aqmeeq pha q bhai ya mevqdaiq-a nail ngaol.

*Aqdoevq doevq nail lovmav*

<sup>4</sup> Yeiqsul jaol nail bha lal yaoq. Aivq neq, aqdoevq doevq nail lovmav ngaol. Tsaol-aq yaq aivq bhai bavq ha khi ngaol-aq, Miqyail aivq bhai tsel dov khi, aqphoiq phoiq deedee nail lovmav ngaol dai, saol-nvq-ai thaq nail ngaol.

<sup>5</sup> Nuljuq iqsanl, aqdoevq doevq nail lovmav ngaol. Miqyail nuljuq bhai oil khi, aqhaqlal phao khe uqhuq thaq nail ilkhaol cov nia dai, yovqgavq nail aqmaol Miqyail bhai av bhiq yaoq. Al ovqtavq, aqhaqlal phao laol bhiq nail phaqlaol bhiq nia dai, nuljuq meeq nail haol nail Philyaq juq pevq lal nail ngaol. Nuljuq Yeiqsul Khali bhai juq khi laol bhiq haq neq, laol bhiq-a nail al juq bhai Miqyail hav bhoel nail ngaol.

<sup>6</sup> Jalliq lavqkhoel-ai niailhai gevq-ai thaq nail ngaol:

“Heldaiq dei-eiq.

Ngaq-i mail

tsel dov-ai thaq nail,

aqphoiq phoiq deedee nail

ilkhaol nail jioivqloiv bhai

kaovq-ai thaq nail

lovmav heeq ma

Yeel-ovq gaoqjaoq bhai

ngal kaovq-ao nail ngaol.

Lovmav al bhai neema

khal thaqtsaol nail tsaol-aq,

maq ya haqsil-ail” dai,

gevq-ai thaq nail ngaol.

<sup>7</sup> Nuljuq neema khal thaqtsaol nail tsaol-aq nail haqbhoil, lovmav al heeq neq, aqphoiq phoiq deedee nail ngaol. Thailhai ngaol-aq,

neema maq thaqtsaol nail tsaol-aq nail haqbbhoil,  
 Jalliq lavqkhoel-ai gevq-ai thaq nail khe-ai,  
 “Ilkhaol cov nail  
 tsaol-aq-i mail  
 bavq ha-a nail  
 lovmav al heeq,  
 jioivqloiv bhai  
 kaovq-ai thaq nail  
 aqphoiq phoiq  
 deedee nail lovmav  
 pevq lal-a nail ngaol”.

<sup>8</sup> Al ovqtavq,  
 “Tsaol-aq phaqtthiq  
 bhi thiq khi,  
 bhi bavq tsuq-ail nail  
 lovmav iqsanl  
 ngel nail ngaol” dai,  
 gevq-ai thaq nail ngaol.

Aqyu juq Miqyail nail daoq maq naldaiq nail  
 ngel-i mail, phaqtthiq thiq khi bavq tsuq ail-a nail  
 ngaol. Niailhai pevq lal nail ngaol dai, milnee  
 uqnee nee Miqyail ge-ai thaq nail ngaol.

*Miqyail nail tsaol-aq pevq lal-a nail ganl*

<sup>9</sup> Thailhai ngaol-aoq, nuljuq neq, Miqyail-i mail  
 tsel dov-a nail jeq-e jaq-a ngaol. Heeqphaq  
 Miqyail nail Philyaq iqsanl ngel nail ngaol. Meeq  
 nail haol nail milkhaoq yaq pevq khi, Miqyail  
 nail tsaol-aq maldil pevq nail ngaol. Miqyail-  
 i mail nl-a nail mao-ail meeq nail ganl yu bhai  
 cavq bhiq nail haqbbhoil, nuljuq alhai pevq nail  
 ngaol. Aivq nuljuq bhai, aqnav nail lavqkhoel  
 nee noeq-u maq dov nail aivq nail aqbhaq  
 lavqkhoel bhai khul bhoel-a nail ngaol. <sup>10</sup> Nuljuq

neq, aq-u phao aqmil maq jiaiv nail tsaol-aq ngaol. Thailhai ngaol-aq, niil aq-il neq, Miqyail nail tsaol-aq pevq lal-a nail ngaol. Nuljuq neq, aq-u phao gaoqhaq gaiq-a nail geeqlaoq bhai maq ya haq-al. Thailhai ngaol-aq, niil aq-il neq, ya-aq nail ngaol.

*Miqyail nail yaqkav jiovg yaoq*

<sup>11</sup> Ngal mao-ail gaiq-a nail aqtsaoq juq-ol, nuljuq neq, miltsaq kovtavq bhai daq-i jiovg thailthaiq nail ngaol. Alheel ngel-i mail, nuljuq nail aqhaqlal bhai genl dev nail aqsivq haqjoil nail neekhaol khaonq ha-ail ceevq yaoq dai, ngal nuljuq bhai gaq bhiq movq-ail nial. <sup>12</sup> Nuljuq laolkivq yaq nail sivtavq bhai aqmeeq pha q nl nl-ail doevq yaoq. Alhai doevq haq neq, aqyu juq nuljuq bhai, haqev nail pha q nl nail tsaol-aq niil dai, oeqbal tha q khi ngaol-aq, nuljuq aqmeeq pha q nl nl-ail doevq nail bhai ya moel-a nail ngel-i mail, Miqyail dov lee-u n-gaol, aqyu juq aivq bhai tsiqeeq nail ngaol.

<sup>13</sup> Heeqphaq Yeiqsul bhaqda nee, heeqphaq juq nail kov-uvq bhai aqmeeq-ai jaol yaoq. Milkhaoq iqsanl bhai uvthaiq nail heeqphaq Gailsaq nail kov-uvq bhai aqmeeq-ai jaol yaoq.

<sup>14</sup> Gailsaq nail kov-uvq bhai ganl nl nail yovkav juq nail kov-uvq bhai iqsanl aqmeeq-ai jaol yaoq. Haqev nail tsaol-aq juq bhai dal bhiq khi, aqmeeq pha q nl nail tsaol-aq juq bhai bhi tsiqeeq nail haqbhoil, Gailsaq-i mail aqyu juq bhai khoel-ai tha q nail ngaol. <sup>15</sup> Nuljuq aqmeeq pha q bhaqda nee, khul maq heeq nail yaqjaoq khaqlal miqthoi nail moeqthaoq bhai

pheethaiq nail haqbhoil, Miqyail neema tsaq nail ngaol. <sup>16</sup> Nuljuq neq, jel ail-a nail tsaol-aq ngaol. Thailhai ngaol-aoq, jel ail-a nail al bhai juq khi, haqev nail pha q tha q gaoq nl. Jel ail-a nail al neq, Miqyail nail yaqkav jio vq nail haqbhoil jel ail-a nail ngaol. <sup>17</sup> Tsaol-aq iqsanl bhai ev yaoq. Aqivq jaqbheq Khali yaq juq bhai gaiq-a yaoq. Miqyail bhai geesil yaoq. Gailsaq bhai ev yaoq.

<sup>18</sup> Yaqkav juq-ol, nuljuq nail ilheel bhai ev khi aqyu juq nail kov-uvq bhai aqmeeq-ai jaol yaoq. Neema meeq khi neenuq neebeiv aol nail ilheel juq nail kov-uvq bhai taivq-ail maq ngel nail. Haqev nail ilheel juq nail kov-uvq bhai iqsanl, aqmeeq-ai ev khi jaol yaoq. <sup>19</sup> Nuljuq Miqyail nail neema tsaq nail pha q bhai heeq nia nail lavqkhoel, maq ngel nail bhai kev dai, khoeq lavq jio vq lavq-u phao, daq jel ol jel haq neq, al nail haqbhoil Miqyail nuljuq bhai geeqlaoq bivq lavq nail ngaol. <sup>20</sup> Nuljuq lai q nail tsa nail pha q nl nail bha qda nee, yu deeq lal kov lal-u phao, ol khi ngaol-aoq, khul tsiqeeq nail pha q jiav nail-aiq. Thailhai ngaol-aoq, aqmeeq pha q nl-a nail ngel-i mail, ya daq-u phao, ol haq neq, Miqyail nuljuq bhai geeqlaoq bivq lavq nail ngaol. <sup>21</sup> Khul khi mail dai ngal-aq neq, nuljuq alhai ya daq dai, Miqyail khul-a nail ngaol. Khali iqsanl, nuljuq nail haqbhoil daq-a nail ngaol. Nuljuq aivq bhai bhi saol oil khi, aivq nail aqkhill pha qyal nail haoqnao bhi tsaothe nail dai khi, aivq alhai nl-a nail ngaol.

<sup>22</sup> "Aivq neq,  
oeqbal maq nl daiq-al.  
Aivq nail moeqthaoq

lavqkhoel-ai  
 goiqbhaoq bhaoq nail daoq  
 maq dov lal daiq-al” dai,  
 gevq-ai thaq nail ngaol.

<sup>23</sup> Yu aivq bhai khal ge movq-ail ge khi ngaol-  
 aoq, aivq yu bhai khal ge movq-ail maq ge kovq  
 bhiq daiq-al. Aivq ya khanq ya daq-u phao, yu  
 bhai maq lav geesil-al. Aqtsaq aqdaol daol dai  
 yalkhaq dal nail Miqyail nail aqlavq lavqkhoel  
 bhai, aivq nail aqmaol av bhiq-a nail ngaol.

<sup>24</sup> Aivq lavqyavq kovtavq bhai khanqsil-u phao,  
 aivq nail aqmaol lavqkhoel-ai ngadao nail oeqbal  
 phi-nq thaq nail ngaol. Ngadao yovqgavq nail  
 oeqbal bhai yovqgavq sil ceiv khi, tsaq nail daol  
 nail haqbhoil ya doevq dai, aivq khanqsil-a nail  
 ngaol. Aivq-i mail nal-a nail malkhoeq bhaqda  
 nee, nuljuq meeq lai-a nail ngaol. <sup>25</sup> Nuljuq neq,  
 aq-u phao gail bheeq bheeq khi peivq ail-a nail  
 yaol khe-ai, dul nail ngaol. Thailhai ngaol-aoq,  
 nuljuq nail aqhaqlal bhai heldaiq phail nail yaol  
 bhai lovqphail nail gaq jaol nail bha niil aq-il  
 nuljuq kovq lal-aoq nail ngaol.

### 3

*Miqyaq yovyaq nail gaiqlaq bhai nl heeq pha-  
 ail tsaq nail pha*

<sup>1-2</sup> Alhai dul dai, khaqma juq-ol. Yovqgavq  
 nail yovjil nail kov-uvq bhai jaol yaoq. Alhai  
 nl nail bhaqda nee, yaqyov-aq teevq pav ganav  
 juq Miqyail nail daoq bhai neema maq thaqtsaol  
 khi ngaol-aoq, nuljuq Miqyail bhai ev khi aqsee  
 aqdaol daol dai doevq nail bhai aqyu juq ya moel

haq neq, nuljuq khul teevq phaḡ iqsanl maḡ cavq khi ngaol-aoḡ, nuljuq alhai doevq nail ngel-i mail, aḡyū juḡ neema thaḡtsaol lal nia nail ngaol. <sup>3</sup> Tsailkheel al jaiḡ jel dai lav sav nail, phul heel al jaiḡ jel dai goe nail, aḡḡaḡ aḡdoi doi nail, alhai aḡmaol nail lavḡniil phao heldaiḡ meeq lal dai, thaḡ lav sav. <sup>4</sup> Nuljuq nail aḡmaol heldaiḡ meeq lal dai, neema lavḡkhoel phao niailhai lav sav yaoḡ. Neema neenuḡ neebeiv aol khi, neema aḡmeeḡ phaḡ aol yaoḡ. Alhai heldaiḡ meeq lal dai lav sav nail phaḡ neq, maḡ cov-ail nia nail nee ovqtavḡ, Miḡyail nail sivtavḡ bhai aḡphoiḡ phoiḡ deedee nail phaḡ pevḡ nail ngaol. <sup>5</sup> Milnee uḡnee nee Miḡyail bhai ev nail yaḡmai-aḡ juḡ iqsanl, aivḡ bhai noeqthunḡ khi yovḡḡavḡ nail aḡmaol heldaiḡ meeq lal dai, alhai lav sav-a nail ngaol. Aḡyū juḡ neq, yovḡḡavḡ nail yovḡil nail kov-uvḡ bhai aḡmeeḡ-ai jaol-a nail ngaol. <sup>6</sup> Saḡlal neq, Aḡbhaḡlaḡhaḡ nail kov-u bhai jaol khi, aivḡ bhai heeqphaḡ dai, khul-a nail ngaol. Nuljuq aḡmeeḡ phaḡ nl nail nee ovqtavḡ, geesil nail neema maḡ aol haq neq, Saḡlal nail yaḡmiḡ khe-ai, dul nail ngaol.

<sup>7</sup> Alhai dul dai, yaḡyov-aḡ juḡ-ol, yovḡḡavḡ nail khaḡma nee mail jaol-u phao, aivḡ nail haḡbhoil saol-nvḡ bhiḡ nail neema aol yaoḡ. Aivḡ naoḡ-ai nee maḡtsil ḡaḡ bhaḡ khi ngaol-aoḡ, naoḡ-ai nee mail aḡdoevḡ bhi doevḡ nail kovpavḡ ya-a nail ngel-i mail, aivḡ bhai ev bhiḡ yaoḡ. Alhai nl haq neq, nuljuḡ geeḡlaḡ hal nail bhai lav tsoiḡ nail phaḡ maḡ jiav-ail.

*Heeq nia nail neema aḡhaol haol dai bhi jiav*

*yaoq*

<sup>8</sup> Haoqnao naosaq niailhai ge movq-ail nial. Nuljuq iqsanl neema teevq heeq bhai tavq yaoq. Teevq gaq nee teevq gaq gaoqhaq yaoq. Aqivq jaqbheq nail gaiqlaq bhai gaiq-a nail khe-ai gaiq-a yaoq. Neema neenuq neebeiv aol khi, aqmeeq pha q nl movq nail neema bhi aol yaoq. <sup>9</sup> Yu haqev nail pha q nl lal khi ngaol-a oq, haqev nail pha q tha q nl kovq bhi q. Yu khal ge movq-ail ge lal khi ngaol-a oq, khal ge movq-ail tha q ge kovq bhi q. Aqyu ju q bhai geeqlao q bivq yaoq. Khul khi mail dai ngal-a q neq, nuljuq geeqlao q ya dai, Miqyail nuljuq bhai khul-a nail ngaol. <sup>10</sup> Jalliq lavqkhoel bhai gevq-ai tha q nail khe-ai,  
 “Aqdoevq doevq movq nail

neema aol khi  
 aqn aqmeeq bhai  
 moel movq nail tsaol-a q,  
 yovqgavq nail moeqlal  
 haqev nail dao q tha q ge,  
 yovqgavq nail  
 moeqthao q iqsanl,  
 goiqbhao q tha q bhao q.

<sup>11</sup> Haqev nail pha q bhai  
 gail jao jao khi,  
 aqmeeq pha q nl yaoq.  
 Tsa q lai jil lai nail  
 pha q bhai halpov khi,  
 al nail haoqnao tsaothe yaoq.

<sup>12</sup> Khul khi mail dai  
 ngal-a q neq,  
 Heeqpha q Miqyail neq,  
 tsa q nail daol nail

tsaol-aq bhai  
heldaiq thailthaiq nail ngaol.  
Aivq aqyu juq nail  
hal daoq bhai  
gaiq thailthaiq nail ngaol.  
Thailhai ngaol-aog,  
haqeiv nail phağ  
khal nl nail tsaol-aq bhai  
Miqyail mağ heldaiq  
tsaoq-ail" dai,  
gevg-ai thağ nail ngaol.

<sup>13</sup> Nuljuq laijai laijai-ail aqmeeq phağ nl hağ neğ, khağ sil gağ nuljuq bhai lav tsoiq lal nia nail-aiq. <sup>14</sup> Thailhai ngaol-aog, aqtsaq aqdaol daol dai nl-a nail bhağda nee, nuljuq yağ dağ hağ neğ, geeqlaoq eeğ nail ngaol. Nuljuq bhai khoeğ lal jiovg lal nail tsaol-aq juğ bhai thağ geesil. Thağ tsaoğ deel-nq-ail. <sup>15</sup> Khali neğ, Heeqphağ ngaol dai, yovqğavğ nail neema lavqkhoel bhai yovqğavğ saol-nvğ khi, aivğ bhai ev yaoğ. Nuljuq-i mail noeqthunğ-ai thağ nail ganl bhai yu naldaiq lal hağ neğ, khalhai ya ge kovğ bhiğ nail dai, khağ mao iqsanl aqmeeq-ai lainğ-ai thağ yaoğ. <sup>16</sup> Thailhai ngaol-aog, neema neenuğ neebeiv aol khi ev nail lavqkhoel nee ge kovğ bhiğ yaoğ. Nuljuq nail heeq nia nail neema aqhaol haol dai, bhi jiav yaoğ. Alhai bhi jiav hağ neğ, Khali nail lavqkhoel bhai nuljuq aqmeeq phağ nl nail bhai ge doil nail tsaol-aq juğ, yovqğavğ nail daoğ bhai yovqğavğ ya hağsil nail ngaol. <sup>17</sup> Miqyail neema tsaq hağ neğ, aqmeeq phağ nl nail ngel-i mail, ya dağ-a nail

neq, haqev nail phaql-nl-a nail ngel-i mail ya daq-a nail nee maqtsil, meeq jaiq nail ngaol.

<sup>18</sup> Khul khi mail dai ngal-aq neq, ngadao nail oeqbal nail haqbhoil Khali teevq pov khanq sil-a nail ngaol. Ngadao bhai Miqyail jaol nail bha hevq kol laivq kivq dai, tsaq nail daol nail al gaq, maq tsaq maq daol nail tsaol-aq nail haqbhoil khanqsil-a nail ngaol. Aivq sil khi ngaol-aog, Aqhaqlal Miqyail bhaqda nee doevq kovq lal-a nail ngaol.

<sup>19</sup> Aivq Aqhaqlal lavqkhoel nee ail khi, thaonq bhai laol-ai thaql nail aqhaqlal juq bhai daoq cavq daoq cov cov ail-a nail ngaol. <sup>20</sup> Aqhaqlal al juq neq, Nol-avq nail yeel bhai Miqyail nail daoq bhai neema maq thaqtsaol nail tsaol-aq juq nail aqhaqlal ngaol. Nol-avq laovq laovq ma lav sav thailthaiq-u phao, aqyu juq Miqyail nail daoq bhai neema thaqtsaol lal dai, Miqyail ol ol-ail daonq khi ngaol-aog, aqyu juq neema maq thaqtsaol lal-al. Tsaol-aq eivq gaq taivq-ail ulcuvq lavqkhoel nee ya jel ail-a nail ngaol.

<sup>21</sup> Alhai dul dai, niil aq-il, ulcuvq saol nail phaql nuljuq bhai bhi jel-ail lavq nail ngaol. Ulcuvq saol nail dai ge nail neq, aqmaol bhai leivq nail aqjiivq aqcavq phaql bhai tsiqhaol nail bhai ge nail maq ngel-ail. Yeiqsul Khali doevq kovq lal-a nail ngel-i mail, Miqyail nail sivtavq bhai heeq nia nail neema haol lal nail bhai ge nail ngaol.

<sup>22</sup> Yeiqsul Khali neq, nqtavq kovtavq bhai dav lai khi, Miqyail nail lavqmal phao jaoldeel-nvq thaql nail ngaol. Nqtavq gaqkhoel maqkhaiq, uvthaiq nail juq maqkhaiq, bhaqaoq eeq nail juq maqkhaiq, aivq nail kov-uvq bhai jaol nail ngaol.

## 4

*Miqyail nail haqbhoil aqdoevq doevq yaoq*

<sup>1</sup> Khali aivq nail aqmaol lavqkhoel bhai haq nail aovq nail phaovq ya daq-u phao, aivq neema thaovq nia-a nail khe-ai, nuljuvq iqsanl thaovq yaoq. Yovqgavq nail aqmaol bhai haq nail aovq nail phaovq ya daq-a nail tsaol-aq, oeqbal bhai gaoqceiv ceiv-a nail ngaol. <sup>2</sup> Alhai gaoqceiv ceiv-a nail tsaol-aq, miltsaq kovtavq bhai aqdoevq doevq-u phao, aqsivq haqjoil nail neekhaol haoqnao maq doevq mail, Miqyail neema tsaovq nail khe-ai, doevq nail ngaol. <sup>3</sup> Milnee uqnee nuljuvq iqsanl laol kivq yaq nl nail khe-ai, nl-a nail ngaol. Aq-u phao, nuljuvq iqsanl maq nl maq hal heeq phaovq-ail tsaovq nail juvq nl-a hal-a nail ngaol. Aqsivq haqjoil nail neekhaol lavqkhoel nee, khaqmiq sev nail phaovq nl khi, jilpheeovq daol bov nail, maq meeovq maq haol nail lavqkhoel nee bhaoqaiq lav sav nail, al jaiq jaq jel daol jel nail, al juvq nl daiq-a nail nee ovqtavq, maq heldaiq nul nail thaovqphaovq aqma maolkhoel bhai uqhuq thaovq daiq-a nail ngaol. Al juvq thaovq gaoq nl. <sup>4</sup> Aqyu juvq alhai haqceiv nail mee nia phaovq nl nail haoqnao niil aq-il nuljuvq maq tsaovq-aoq nail ngel-i mail, aqyu juvq noeq-u maq dov dai pevq-ail khi, nuljuvq bhai khal ge movq-ail ge nail ngaol. <sup>5</sup> Thailhai ngaol-aoq, yalkhaq dal nail Miqyail nail sivitavq bhai aqyu juvq yovqgavq nail ganl yovqgavq ya ge daiq bhiq nail ngaol. Yalkhaq dal nail al gaq, aqdoevq doevq nail tsaovq-aoq bhai maqkhaiq, sil thaovq nail tsaovq-aoq bhai maqkhaiq, yalkhaq dal nail dai khi, lainq-ai thaovq nail ngaol. <sup>6</sup> Alheel

ngel-i mail, sil thaq nail tsaol-aq bhai iqsanl lavqkhiq tsail nail geeqlaoq daoq cavq bhiq-a nail ngaol. Khul khi mail dai ngal-aq neq, aqsivq haqjoil phi khi, aqdoevq doevq nail tsaol-aq khe-ai, aqyu juq yalkhaq dal nail bhai ya daq khi ngaol-aq, Miqyail doevq nail khe-ai, aqyu juq aqhaqlal phao ya doevq dai, cavq bhiq-a nail ngaol.

<sup>7</sup> Yaoq pha q yaoq-ao nee haoqnao naosaq nail aqjail jail lal-aq nail ngaol. Alheel ngel-i mail, geeqlaoq aqmeeq-ai hal kivq dai, yovqgavq nail neema bhai gaq lai khi, aqgeel geel dai ya bhi jiav nail ngaol. <sup>8</sup> Nuljuq teevq gaq nee teevq gaq gaiq-a deedee yaoq. Daoq niil daoq neq, eeq deedee nail daoq ngaol. Khul khi mail dai ngal-aq neq, goil nail gaiq-a nail pha q neq, mao-ail mao nail oeqbal bhai doeqkhaiq-ai tha q nia nail ngaol. <sup>9</sup> Teevq gaq nee teevq gaq, daoq govq ma q daoq dai, daq-i bhai aqmeeq-ai hav yaoq. <sup>10</sup> Nuljuq teevq gaq nee teevq gaq aqhaqlal phao khe kovpavq ya-a nail khe-ai, teevq ga nee teevq gaq nail haqbhoil yuq yaoq. Alhai yuq haq neq, Miqyail nail geeqlaoq eeljaol mee nia pha q bhai aqmeeq-ai heldai q phail nail tsaol-aq pevq nail ngaol. <sup>11</sup> Yu bhai cavq bhiq cov bhiq nail tsaol-aq, Miqyail-i mail bhi cavq bhi cov lavq nail khe-ai cavq yaoq. Yu bhai tsaojao-ai nail tsaol-aq, Miqyail ga q bivq lavq nail khe-ai, tsaojao-ai bhiq yaoq. Alhai nl haq neq, Yeiqsul Khali bhaqda nee, yaoq pha q yaoq-ao nee nail lavqkhoel, yu Miqyail bhai tsiqeeq lal nail ngaol. Yeiqsul Khali nail kovtavq-ai seiqleiq khaoqsail khi bhaqaoq, nqmaq maqluv halyeel jiav dei-eiq. Aqmiq.

*Khali yaq pevq lal-a nail ngel-i mail, ya daq nail ganl*

<sup>12</sup> Ngal mao-ail gaiq-a nail aqtsaoq juq-ol, haq dee aoq deede nail pha q laonqdaiq lal-u phao, noeq maq dov dai, tha q pevq-ail. Al neq, noeq-u maq dov heeq pha q-ail pevq nail pha q maq ngel-ail. <sup>13</sup> Khali ya daq-a nail khe-ai, nuljuq iqsanl ya daq-a nail ngel-i mail, lavqkhiq tsail yaoq. Alhai lavqkhiq tsail haq neq, aivq nail seiqlaiq khaoqsail bha q dol leevq-u phao, nuljuq a dai nee maqtsil lavqkhiq ya tsail nail ngaol. <sup>14</sup> Khali nail aqmil bha qda nee yu nuljuq bhai khal ge movq-ail ge lal haq neq, nuljuq geeqlaoq eeq nail ngaol. Khul khi mail dai ngal-aq neq, seiqlaiq khaoqsail eeq nail Miqyail nail Aqhaqlal nuljuq nail kovtavq bhai jaol nail ngaol. <sup>15</sup> Yu bhai lav heivq nail, yu nail nlmaoq khoiq nail, haqev nail pha q nl nail, yu bhai suqsaq nail, niil juq bha qda nee nuljuq teevq gaq-ail ya daq nail pha q, tha q bhi pevq. <sup>16</sup> Thailhai ngaol-aq, nuljuq teevq gaq ganav Khali yaq pevq nail ngel-i mail, ya daq-a nail phal-iq neq, tha q haqsil. Khali nail aqmil bha qda nee Miqyail bhai tsiqeeq yaoq. <sup>17</sup> Miqyail iqmoeq ilmoeq yalkhaq dal nail aqyanq kev lee-aiq nail ngaol. Aivq aivq nail yaq juq bhai iqmoeq yalkhaq dal nail ngaol. Aivq ngadao bhai iqmoeq yalkhaq dal haq neq, Miqyail nail lavqkhiq tsail nail geeqlaoq daoq bhai maq naldaiq nail tsaol-aq nail haqbhoil, haoqnao naosaq-u phao khalhai pevq lal nail-aiq. <sup>18</sup> Jalliq lavqkhoel bhai gevq-ai tha q nail khe-ai, "Tsaq nail daol nail tsaol-aq hevqkovq nail pha q

ya nail haq-a neq,  
 Miqyail bhai maq ev nail  
 oeqbal yaq juq khalhai khi  
 jel-ail nia nail-aiq" dai,  
 gevq-ai thaq nail ngaol.

<sup>19</sup> Alheel ngel-i mail, Miqyail neema tsaq nail  
 khe-ai ya daq nail tsaol-aq, nuljuq bhai teivq khi  
 saljial ivq nail gaq nail aqlavq lavqkhoel bhai  
 yovqgavq nail aqmaol av bhiq khi, aqmeeq pha  
 q nl dal laivq yaoq.

## 5

### *Miqyail nail yaol mavqmav bhai heldaiq phail yaoq*

<sup>1</sup> Ngal nuljuq Khali yaq munl bhai heldaiq  
 phail nail aqivq aqtsu juq bhai hal movq-ail nial.  
 Ngal iqsanl, nuljuq khe-ai Khali yaq munl bhai  
 heldaiq phail nail aqivq teevq gaq ngaol. Khali  
 ya daq deedee-a nail bhai ngal ya moel-a nail  
 ngaol. Yaqhao khe dov lee nail seiqleiq kha  
 oqsail bhai ngal iqsanl ya nail ngaol. <sup>2</sup> Nuljuq nail kov-  
 uvq bhai jaol nail Miqyail nail yaol mavqmav  
 bhai aqmeeq-ai heldaiq phail yaoq. Maq heldaiq  
 phail mail khul maq khi kivq nail ngel-i mail,  
 heldaiq phail nail pha q tha q bhi pevq. Miqyail  
 nail ganl nl nail khe-ai, lavqkhiq teevq tsail  
 heldaiq phail yaoq. Phul heel ya lal nail gal  
 duq taivq-ail maq ngel-ail dai, noeq khi neema  
 lavqkhoel nee nl nail pha q bhi pevq yaoq. <sup>3</sup> Naoq  
 nail yaol mavqmav nail kovtavq bhai naoq nail  
 alyaq yuq khi tha q uvthaiq. Yaol mavqmav saol  
 oil duq jia v dai, nl daiq hal daiq bhiq yaoq.

<sup>4</sup> Alhai nl haq neq, yaol lovq juq iqsanl nail kovtavq bhai heldaiq phail nail gaq dov lee-u phao, seiqlaiq khaoqsail jiav nail heel uqtsaoq nuljuq ya nail ngaol. Heel uqtsaoq al tsaog neq, maq khuq maq kov-ail nia-ail.

<sup>5</sup> Alhai dul dai, yaqyov-aq yaqnoil juq-ol, joiq-maoq mavmaoq juq nail kov-uvq bhai aqmeeq-ai jaol yaoq. Nuljuq yaoq gaq yaoq-ao nee teevq gaq nail kov-uvq bhai teevq gaq yaqkav khe-ai, thaqttheq nail neema aol yaoq. Khul khi mail dai ngal-aq neq,

“Miqyail neema eeq nail  
heel nail tsaol-aq bhai  
lav tsoiq nail ngaol.  
Thailhai ngaol-aog,  
neema thaqttheq nail  
juq bhai neq,  
geeqlaoq eeljaol  
bivq nail ngaol” dai,

gevq-ai thaq nail ngaol.

<sup>6</sup> Alheel ngel-i mail, aqyanq tsaq lal-u phao, Miqyail nuljuq bhai thaqeeq thaqheel lavq nail haqbhoil, aivq nail bhaqaoq eeq nail aqlavq kov-uvq bhai neema thaqttheq khi jaol yaoq. <sup>7</sup> Miqyail nuljuq nail haqbhoil saol-nvq nail ngel-i mail, nuljuq-i khaoqlaol nail yaoq pha q yaoq-ao nee aivq bhai av bhiq yaoq.

<sup>8</sup> Yaolphaol khi aqgeel geel dai jaol yaoq. Nuljuq bhai neejlav jiav nail neivq heeqphaq neq, geeq nail allaqjaqsil khe-ai, nuljuq bhai keivq heivq jaq nail dai khi, jaoq jaoq-ai halpov nail ngaol. <sup>9</sup> Neema thaqttsaol nail pha q ivq nail lavqkhoel nee, aivq bhai lav tsoiq yaoq. Miltsaq

kovtavq-ai jaol nail nuljuq nail aqivq jaqbheq  
Khali yaq juq iqsanl niailhai ya daq thailthaiq  
nail ngaol dai, heeq kivq thaq-ai yaoq.

<sup>10</sup> Geeqlaoq eeljaol teevq bhee aol nail Miqyail  
Khali bhai juq khi, nqmaq maqluv halyeel ivq  
nail seiqlaiq khaoqsail bhai aol lai kivq dai,  
nuljuq bhai khul-a nail ngaol. Alheel ngel-i mail,  
nuljuq teevq yang taivq-ail ya daq gaq haq neq,  
aivq nuljuq bhai bhi bhee lal, bhi ivq lal khi, gaq  
bivq kovq lavq nail ngaol. <sup>11</sup> Miqyail neq, nqmaq  
maqluv halyeel bhaqaoq jiaiv dei-eiq. Aqmiq.

### *Haoqnao naosaq khe daoq*

<sup>12</sup> Saljial ivq nail ngaol dai, ngaq-i mail saol-  
nvq-ai thaq nail aqivq jaqbheq Siqlav bhai juq  
khi, ngal nuljuq bhai haoqgavq davqnil nil dai,  
gevg bhoel-ai leevq-a nail ngaol. Nuljuq bhai  
gaq bivq khi, nuljuq-i mail hav bhoel gaq-a nail  
geeqlaoq eeljaol al, maldil Miqyail nail geeqlaoq  
eeljaol ngaol dai, salkhil khanq nail dai khi,  
haoqgavq niil gevg bhoel-ai leevq-a nail ngaol.  
Geeqlaoq eeljaol al nail lavqkhoel bhai ivqdao  
dai, jaol yaoq. <sup>13</sup> Miqyail nuljuq bhai tsel dov-  
a nail khe-ai, tsel dov-ai thaq nail Bhaqbhulloq  
meenq bhai jaol nail munl, nuljuq bhai noeq  
moel naol dai, daoq cavq cavq bhoel-ai leevq-  
a nail ngaol. Ngaq nail yaqyov Maqkul iqsanl,  
nuljuq bhai noeq moel naol dai, daoq cavq cavq  
bhoel-ai leevq-a nail ngaol. <sup>14</sup> Nuljuq teevq gaq  
nee teevq gaq goil nail gaiq-a nail lavqkhoel nee,  
aqlavq he yaoq. Khali nail lavqkhoel bhai jaol  
nail nuljuq iqsanl nail kovtavq bhai neesal-ovq  
nail phaiv jiaiv dei-eiq.

**Jalliq aqsivq Gaolkheel daoq**  
**Akeu: Jalliq aqsivq Gaolkheel daoq New Testament**  
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
aaaba9fd-8172-55cc-ad15-906f43ddb5a5